

Saray Reperensya Parad Workbook ed Aral

ENERO 3-9

KAYAMANAN ED SALITA NA DIOS | UKOM 15-16

“Panagtraidor—Kabkabusol Tayo Itan!”

w12 4/15 9 ¶4

Ag-inkamatoor—Mapeligron Tanda na Kaunoran Iran Agew!

⁴ Say unona et say manamalikdon si Delila, ya inad-aro nen Ukom ya Samson. Labay ya idaulo nen Samson so pibakal na saray totoo na Dios sumpad saray Filisteo. Nayarin naimano na limaran arari na saray Filisteo ya agmet talaga inaro nen Delila si Samson, kalian inopresian day Delila na baleg a kantidad pian amtaey sekreto na nikadkaduman biskeg nen Samson pian napatey da. Lapud inkaagum nen Delila, inawat to itan. Amitlo ton sinalin amtaey sekreto nen Samson balet ta sinmaew. Ginonigon nen Delila si Samson ‘ya inagew-agew ed saray salita to, tan sikato so pinilit to.’ Kalian “say kamarerwa to apairap ya angga ed patey.” Imbaga nen Samson ya agnin balot akatlian so buek to ta no nagawa itan, naandi so biskeg to. Sanen namtaan itan nen Delila, impakatli toy buek nen Samson legan a naugip ed akwalan to. Insan to inter si Samson ed saray kalaban to tan inabuloyan ton gawaen da lay labay da. (Uko. 16:4, 5, 15-21) Agaylay uges na ginawa to! Lapud inkaagum to, trinaidor toy lakin mangaarod sikato.

w05 1/15 27 ¶4

Saray Pabitar ed Libro na Uko-ukom

14:16, 17; 16:16. Say panesdes ed arum a too panamegley na iyakis tan isyodot so nayarin manderan na relasyon.—Uliran 19:13; 21:19.

w12 4/15 11-12 ¶15-16

Ag-inkamatoor—Mapeligron Tanda na Kaunoran Iran Agew!

¹⁵ Panon a napansiansia na sanasawa so katooran dad sakey tan sakey? Oniyay ibabaga na

Salita na Dios: “Manliket ka ed asawa na inkaugaw mo” tan, “Miamong ka a malikeliket ed asawa ya inarom.” (Uli. 5:18; Ecl. 9:9) Legan iran ontatatkten, kaukolan dan gawaey anggaay naryan dan paeleton so relasyon da, namparan diad pisikal tan emosyonal. Kabaliksan na satan ya asikasoen day *balang sakey*, mangiganay panaon parad *balang sakey*, tan onapit ed *balang sakey*. Nepeg a protektaan na sanasawa so panamaley da tan say relasyon dad si Jehova. Pian nagawaan iya kaukolan a *saniba* ran manaral na Biblia, *saniba* ran mankindem a regular ed ministryo, tan *saniba* ran manpikasid si Jehova.

MANSIANSIAN MATOOR ED SI JEHOVA

¹⁶ Wala ray agagin akagaway seryoson kasalan tan adisiplinan “maong, pian magmaliw iran mabiskeg ed pananisia.” (Tito 1:13) Lapud mauges a konduktta na arum, kaukolan iran nadispelosip. Parad “saramay nipasal ed satan,” say disiplina so akatulong ed sikara pian nipa-wil so relasyon dad Dios. (Heb. 12:11) Panon to no walay kanayon odino maapit a kaaro tayon adispelosip? Natan nasubok so katooran tayo, aliwan diad samay too, noagta diad Dios. limanoen nen Jehova no kasin uunoren tayoy ganggan ton agmiulop ed *siopaman* ya adispelosip.—**Basaen so 1 Corinto 5:11-13.**

Saray Espiritual a Kayamanan

w05 3/15 27 ¶6

Tinmalona si Samson Lapud Tulong nen Jehova!

Determinado si Samson a manumpal ed gagala to, say pilalaban ed saray Filisteo. Sikatoy nampirmi ed abung na sakey a balangkantis diad Gaza ta pian makapilaban ed kakabusol na Dios. Kinaukolan nen Samson so pandawesan legan na labi diad syudad na kabusol, tan naromog itan diad abung na sakey a balangkantis. Anggapo so imoral a getma nen Samson. Diad pegley-labi et sikatoy tinmaynan ed abung na

bii, a binagot to iray kapot na wangalan na syudad tan say duaran lusek, tan sinakbat to iratan ya inyakar ed toktok na palandey ya asingga ed Hebron, a manga 60 kilometro ed kaarawi. Agawaan to itan lapud panangabobon tan biskeg ya inter na Dios.—Uko-ukom 16:1-3.

ENERO 10-16

KAYAMANAN ED SALITA NA DIOS | UKOM 17-19

“Dakel so Problema No Ag-unoren Iray Ganggan na Dios”

mwbr22.01—it-2 390-391

Miqueas

1. Laki ya tagad Efraim. Sinumlang nen Miqueas so komawalo ed Samploran Ganggan (Ex 20:15) nen inala toy 1,100 a piraso na pilak nen ina to. Nen inamin to tan impawil to itan, oniyay kuan nen ina to: “Pasantosen ko parad si Jehova so pilak a sankabembenan ko, pian usaren iya na ana’ko ed panggawa na sakey ya imahen tan sakey a metal ya estatua. Ipawil ko la natan ed sika.” Insan angala so ina to na 200 a piraso na pilak tan inter tod managpanday na pilak pian gawaen itan ya “sakey ya imahen tan sakey a metal ya estatua” insan kayari to et niyyan iratan ed abung nen Miqueas. Walaan na “abung parad saray dirios” si Miqueas, tan sikatoy nanggawa na sakey ya efod tan saray estatua a terafim tan tinuro toy sakey ed saray anak to pian manlingkor bilang saserdote to. Anggaman singa ompapaway ya parad si Jehova itan, diad tua et talagan aliwa itan ta asumlang so ganggan ya mangisesebel ed idolatriya (Ex 20:4-6) tan nibaliwala so tabernakulo nen Jehova tan say uksayan to parad inkasaserdote. (Uk 17:1-6; De 12:1-14) Ag-abayag, inawit nen Miqueas ed abung to si Jonatan ya nanlapud poli na anak nen Moises ya si Gersom, tan inupaan to iyan kabataan ya Levita pian manlingkor

bilang saserdote to. (Uk 18:4, 30) Manliket si Miqueas balet aliwa so inisip to a kuan to: “Natan et amtak a gawaen nen Jehova so maabig ed siak.” (Uk 17:7-13) Agnanlapu ed poli nen Aaron si Jonatan kanian aliwan kualipikado ya manlingkor bilang saserdote, kanian inmarum labat iya ed lingo nen Miqueas.—Nu 3:10.

mwbr22.01—it-2 391 ¶2

Miqueas

Ag-abayag, inusilan nen Miqueas tan saray kakaiba ton lalaki iray Danita. Nen nabotan da ray Danita, tinepetan ira na saray Danita no antoy problema, oniyay imbaga nen Miqueas: “Inala yo iray dirios a ginawak, tan impila yo pati say saserdote. Anto ni akera ed siak?” Diad saman et pinasakbayan na saray Danita si Miqueas ya patteyen da no ituloy to ni pangusil tod sikara tan panreklamo to. Sanen anengneng nen Miqueas a mas mabiskeg ira nen say sikato, amawil lad abung to. (Uk 18:22-26) Kayari na satan et pinatey na saray Danita iray totoo ed Lais tan pinoolan da itan, insan da impaalagey so syudad na Dan ed satan ya pasen. Nagmaliw ya saserdote na saray Danita si Jonatan tan saray ananak to tan “impaalagey da so inukit ya imahen a ginawa nen Miqueas, tan nansiansia ditan diad amin ya agew a walad Silo so abung na tuan Dios [say tabernakulo].”—Uk 18:27-31.

Saray Espiritual a Kayamanan

w15 12/15 10 ¶6

Biblia ya Malinew, Mainomay ya Talosan, tan Sabien Toy Puso

6 Diad panaon tayo, mas naaruman so paneknek ya nepeg ya pansiansiaen so ngaran na Dios ed Biblia. Diad 2013 ya revised a *New World Translation*, 7,216 a beses ya nabasa so ngaran na Dios, mas dakel itan na 6 nen samay 1984 ya edisyon. Say limara ed saratan et nabasad 1 Samuel 2:25; 6:3; 10:26; 23:14, 16. Say rason no akin ya inyan so ngaran na Dios ed saratan

ya bersikulo et lapud nabasa itan diad saray adiskobrin Dead Sea Scroll ya mas daan ni na masulok ya 1,000 a taon no ikomparad Hebreon Masoretikon manuskrito. Ontan met, inyan so ngaran na Dios ed Uko-ukom 19:18 bilang resulta na impanaral a maong ed saray kadaanan ya manuskrito.

ENERO 17-23

KAYAMANAN ED SALITA NA DIOS | UKOM 20-21

“Tuloytuloy ya Manpaigiya ed si Jehova”

w11 9/15 32 ¶2

Kasin Aligen Moy Finehas Sano Nasusubok Ka?

Sanen ni-*rape* tan pinatey na saray taga Gabaa a tribu na Benjamin so kalugoran na sakey a Le-vita, namparaan a milaban ed sikara so arum a tribu. (Uko. 20:1-11) Antis iran akilaban, impikasi ran tulongan ira komon nen Jehova. Balet amidua ran atalo tan dakel so inaatey. (Uko. 20: 14-25) Kasin inisip da ya agdinengel na Dios so pikakasi ra? Kasin interesado si Jehova ya nanengneng no anton talagay reaksion dad kaugsan?

w11 9/15 32 ¶4

Kasin Aligen Moy Finehas Sano Nasusubok Ka?

Antoy naaralan tayod saya? Wala ray problemad kongregasyon ya agtampol nasolbar anggaman mansasagpot tan ipipikasi itan na saray elder. No nagawa iya, maabig no tandaan na saray elder so imbag a nen Jesus: “Mantultuloy kayon onkerew, tan naikdan kayo; mantultuloy kayon mananap, tan makaromog kayo; mantultuloy kayon ontoktok, tan nalukasan kayo.” (Luc. 11:9) Anggano singa atrasado so ebat ed pikakasi na saray manangasikaso, seguradon ebatan itan nen Jehova ed dungan panaon.

Saray Espiritual a Kayamanan

mwbr22.01-w14 5/1 11 ¶4-6

Kasin Antam?

Panon ya inusar iray palsot ed guerra nensaman?

Palsot so inusar nen David pian pateyen so higanten si Goliat. Nayarin apasalan nen David so mangusar na palsot legan na saray taon na pam-papastol to nen ugaw ni.—1 Samuel 17:40-50.

Nanengneng so palsot ed art na saray Ehipsio tan Asiryano ed panaon na Biblia. Gawa iya ed duaran lubir ya walay inkawing ya katat odino tela ya pangibalaan na bato. Iyan na managsalsot ed samay katat o tela so makinis odino malimpek ya bato ya duara anggad taloran pulgada so kabaleg to tan manbelat na manga 250 gramo. Mapmaples ton iwasiwes so palsot ed tagey na ulo to insan to biglan ikbanan may sakey ya lubir pian onkena so bato ed labay ton tiraen.

Diad Middle East, dakdakel so akotkot ya palsot ya inusar ed saray guerra nensaman. Sarag ya ipalsot na sakey ya marunong ya migi-guerra so sakey a bato diad peles ya 160 anggad 240 kilometer kada oras. Pandedebatian na saray iskolar no kasin parehas labat so kaarawi na natira na palsot no ikompara ed pana, balet say segurado et makapatey met itan.—Ukom 20:16.

ENERO 24-30

KAYAMANAN ED SALITA NA DIOS | RUTH 1-2

“Ipatnag so Matoor ya Panangaro”

w16.02 14 ¶5

Aligen Iray Malet ya Kaaro nen Jehova

⁵ Sarag komon ya ikatunongan nen Rut a walay pamilya to ed Moab, ta wadman so ina to tan arum a kakanayon to ya nayarin mangasikaso tan ontulong ed sikato lapud abalo la. Ditan so

binalegan to. Ditan met so kawalaay kultura, lenguahe, tan saray kabaleyán to. Agnipasegu-ro nen Noemi ya magmaliw met a maabig so kipapasen nen Rut diad Betlehem. Diad tua, bi-nagaan toy Rut ya ontílak lad Moab. Mapaga si Noemi ta agto la naikdan na asawa odino pana-yaman iray manugang to. Anto kasi gawaen nen Rut? Imanoen so pidumaan tod si Orpa ya ‘pin-mawil ed baley to, *tan diad saray dios to.*’ (Rut 1:9-15) Labay met kasi nen Rut so ompawil ed saray palson dios na saray kabaleyán to? Andi.

w16.02 14 ¶6

Alien Iray Malet ya Kaaro nen Jehova

⁶ Nayarin akabat nen Rut si Jehova a Dios panamegley na asawa ton inatey la odino panamegley nen Noemi. Si Jehova et aliwan singa saray dios na Moab. Amta nen Rut a si Jehova so makane-pegran ed panangaro tan panagdayew to. Balet aliwan magenap so amta to. Kaukolan ya mandesisyon si Rut. Kasin pilien to si Jehova bilang Dios to? Makabat so desisyon nen Rut. Inkuan tod si Noemi: “Say baley mo sikato so baley ko tan say Dios mo, Dios ko.” (Rut 1:16) Makapaligsay puso so panangaro nen Rut ed si Noemi, balet mas importante so impanengneng ton panangaro ed si Jehova. Kanian si Rut et kinomendaan nen Boaz a makankayarian na dalin lapud manpapasalimbeng ed silong na saray payak nen Jehova. (**Basaen so Rut 2:12.**) Nayarin nanonotan tayod satan so sakey a sibong ya manpapasalimbeng ed silong na saray payak na mabiskeg tan maasikason ina to. (Sal. 36:7; 91: 1-4) Si Jehova et singa ontan ya ateng ed si Rut. Sikatoy benendisyonal to lapud pananisia to, tan agbalot nagbabawian nen Rut so desisyon to.

Saray Espiritual a Kayamanan

w05 3/1 27 ¶1

Saray Pabitar ed Libro na Rut

1:13, 21—Kasin si Jehova so lapuan na agay-lay pait a bilay tan trahedyan asagmak nen

Noemi? Andi, tan agtinetel nen Noemi so Dios ed antokaman a gawan-mauges. Balet, nisen-neg ed amin a trahedyan asagmak to, say abaloan to et sumpa ed sikato si Jehova. Mapaloy sakit na liknaan tan inkadismaya to. Niarum ni, diad saraman a panaon et ipa-pasen so bunga na eges bilang bendisyón tan say inkalepes et sakey ya ayew. Nayarin likna-en nen Noemi a makatunongan labat ya isipen ton sikatoy impaabeba nen Jehova, lapud ta anggapo la lanti apo to, inatey ni so duaran anak to.

ENERO 31–PEBRERO 6

KAYAMANAN ED SALITA NA DIOS | RUTH 3-4

“Manggaway Maong ya Reputasyon tan Pansiansiaen Itan”

w12 10/1 22 ¶5

‘Magalang ya Bii’

Nansalitay Boaz, tan maseguron diad abeba tan mauyamon boses to et akainaway Rut. Inkuan to: “Nabendisyonal ka komon ed Jehova, ana’ko; impatnag mo so laot a kaabigan na linawa ed kaunoran ya anggan nen dia ed gapo, bang-ta agka tinmumbok ed saray tobonbalo a lalaki, odino duka odino mayaman.” (Rut 3:10) Say tutukoyen nen Boaz ya ginawa nen Rut “diad ed gapo” et say matoor a panangaro to sa-nen inibaan toy Noemi pasempet ed Israel tan inasikaso to. Samay “kaunoran” balet et sayay kakkayari ton ginawa. Amta nen Boaz ya map-mainomay nen Rut so makapiasawad mas ugaw, pobri man o mayaman. Balet, mapatnag ya labay nen Rut so manggaway kaabigan parad si Noemi tan ed inatey lan katulangan to, pian mantultuloy so poli na pamilya ra. Kampegan pandinayewan nen Boaz ta agto ninonot so sa-rilin pankaabigan to.

w12 10/1 23 ¶1

‘Magalang ya Bii’

Seguradon makakaliket so puso nen Rut legan ton nononoten imay imbaga nen Boaz—ya sikatoy balitadon ‘magalang a bii’! Ontan so reputasyon to lapud bulos-linawa ton kinabat tan nilingkoray Jehova. Maomaong met ed si Noemi tan ed saray kabaleyán to, akibagay ed saray ugali tan kultura da anggano aliwan onman so akasanayan to. Singa si Rut, gawaen tayo anggaay nayarian tayon respetoen so arum, anggan sananey so kultura tan ugali da. No gawaen tayo itan, nawalaan itayo met na maabig a reputasyon.

w12 10/1 24 ¶3

‘Magalang ya Bii’

Inasawa nen Boaz si Rut. Tan oniay agawa: “Si Jehova initer to ed [si Rut] so panlukon, tan angiyakanak na sakey a laki.” Akiliket ed si Noemi iray bibiid Betlehem tan indayew day Rut lapud sikatoy magmaong nen say pitoran anak a laki. Diad inlabas na panaon, naamtaan tayon samay anak nen Rut et laki nen Arin David. (Rut 4:11-22) Tan diad poli nen David so nanlapuan nen Jesu-Kristo.—Mateo 1:1.

Saray Espiritual a Kayamanan

w05 3/1 29 ¶3

Saray Pabitar ed Libro na Rut

4:6—Panon a “naderal” na mananondon so tawir to diad gawaen ton panondon? Unoña, no say sakey a mankukuranges et ilako toy tawir ton dalin, kaukolan a saliwen itan na mananondon diad presyo a nadetermina ed karakel na nakekeraan a taon anggad onsublay a Jubileo. (Levitico 25:25-27) No saliwen to itan, nabawasan so kayamanan to. Sakey ni, no mananak si Rut, satan ya anak a laki so manawir ed sinaliw ya alog, imbes a saray kaplesan a sinkaasinggeran a kakanayon na mananondon.

PEBRERO 7-13

KAYAMANAN ED SALITA NA DIOS | 1 SAMUEL 1-2

“Ibagam ed si Jehova so Amin ya Naliliknam”

ia 55 ¶12

Imbesngaw Tod Dios so Walad Puso To

¹² Maong sirin ya alimbawa si Hana ed amin ya lingkor na Dios no nipaakar ed panagpikasi. Lapud maaroy Jehova, labalabay ton ibesngaw tayod sikato so amin a walad puso tayo. Ibaga tayod sikato iray pakapapagaan tayo, singa sakey ya ugaw a mataletalek ya onasingger ed maaron ateng to. (*Basaen so Salmo 62:8; 1 Tesalonica 5:17.*) Pinuyanan nen Jehova si apostol Pedro ya isulat irayan salita: “Ipaawit yo . . . ed sikato so amin a kapagaan yo, lapud uyaansakit to kayo.”—1 Ped. 5:7.

w07 3/15 16 ¶4

No Panon a Dinmeen so Kanonotan nen Ana

Anto so naaralan tayo ed sayan amin? Sano manpipikasi itayo ed si Jehova nipaakar ed saray kapagaan tayo, sarag tayon ipaamta ed sikato no anto so nalilikna tayo tan say impapuso iran kerew tayo. No anggapo lay nagawaan tayo pian resolbien so problema, ipalima tayo la itan ed sikato. Saya so sinkaabigan lan gawanen.—Uliran 3:5, 6.

Saray Espiritual a Kayamanan

w05 3/15 21 ¶5

Saray Pabitar ed Libro na Unionan Samuel

2:10—Akin ya impikasi nen Ana a si Jehova so “mangiter na biskeg ed ari to” anta anggapo so toon ari a manuuley ed Israel? Say ideya a nawalaan na toon ari iray Israelita so nipa-sakbay ed Mosaikon Ganggan. (Deuteronomio 17:14-18) Sanen magano lan ompatey si Jacob, oniay impropesiya to: “Say setro [sakey a

simbolo na maarin pakauley] ag-ontaynan ed Juda naani." (Genesis 49:10) Niarum ni, oniay inkuan nen Jehova nipaakar ed si Sara, say inmunan ateng na saray Israelita: "Saray arari na katoaan naani nianak ed sikato." (Genesis 17:16) Sirin, si Ana so mangipipikasi nipaakar ed arapen ya ari.

PEBRERO 14-20

KAYAMANAN ED SALITA NA DIOS | 1 SAMUEL 3-5

"Makonsidera si Jehova"

w18.09 24 ¶3

Makapanyarin-amin Balet Makonsidera

³ Ugaw ni Samuel nen ginmapon "nanlingkor ed si Jehova" diad tabernakulo. (1 Sam. 3:1) Sakey ya labi, nen akarukol lay Samuel, walay makapakelaw ya agawa. (**Basaen so 1 Samuel 3:2-10.**) Walay nadngel ton boses ya manatawag ed ngaran to. Lapud say amta to et boses iman na masiken lan Atagey a Saserdote ya si Eli, batik si Samuel ed sikato tan imbaga to: "Wadia ak, ta tinawag yo ak." Imbaga nen Eli ya agto tinawag. Nen agawa lamet iman ya amidua, atebek nen Eli ya say Dios so manatawag ed si Samuel. Kanian imbaga tod ugaw nin Samuel no antoy iyebat to, tan inunor to itan. Akin ya agtampol impakabat nen Jehova so sarily to ed si Samuel diad unionan panganawnawa ni labat? Anggapoy ibabaga na Biblia, balet ipapanengneng na nantutumbokan ya agawa a say sakey ya importantin rason et lapud konsiderasyon to ed ugaw nin Samuel. Panon?

w18.09 24 ¶4

Makapanyarin-amin Balet Makonsidera

⁴ Basaen so 1 Samuel 3:11-18. Kaiba ed Ganggan nen Jehova ya nepeg a respetoen na saray ugugaw iray maedad la, lalo la no sakey a pangulo. (Exo. 22:28; Lev. 19:32) Kasin naimadyin

moy Samuel ya kabangon tod kabuasan et onlad si Eli tan makmakpel ton ibaga so makapakebbiew ya mensahe na panangukom na Dios? Siempre andi! Diad tua, nabasa tayo ya "natatakot si Samuel a mangibagad si Eli ed samay anengneng ton pasingawey." Balet, sineguro na Dios ed si Eli ya Sikato so manatawag ed si Samuel. Kanian si Eli lay nantepet ed si Samuel tan imbaga ton mansalita labat. 'Agmo iyaamot ed siak so anggan sakey a salita ed amin ya imbaga tod sika,' so imbaga nen Eli. Tinmulok si Samuel, 'imbaga ton amin ed sika-to.'

Saray Espiritual a Kayamanan

w05 3/15 21 ¶6

Saray Pabitar ed Libro na Unionan Samuel

3:3—Talaga kasin naugip si Samuel ed Sankasantosan a pasen? Andi, agnaugip ditan. Si Samuel et sakey a Levita diad aliwan saserdoten pamilya na saray Coatita. (1 Awaran 6: 33-38) Lapud satan, sikatoy agnaabuloyan ya "onloob a mannengneng [ed] santuario." (Numeros 4:17-20) Say alenleneg a kabiangan na santuario a nalooban nen Samuel et say loloban ed tabernakulo. Nayarin ditan so naugipan to. Mapatnag a si Eli so naugip met ditan. Say balikas a "kawalaan na kaban na Dios" so malinew a manutukoy ed interon tabernakulo.

PEBRERO 21-27

KAYAMANAN ED SALITA NA DIOS | 1 SAMUEL 6-8

"Siopa so Ari Yo?"

mwbr22.01—it-2 163 ¶1

Panarian na Dios

Kinmerew Ira na Toon Ari. Ngalngali 400 taon kayari impaway na saray Israelita ed Ehipto tan masulok ya 800 taon manlapu nen akisipanan so Dios ed si Abraham, kinmerew iray Israelita

na toon ari ya mangidaulo ed sikara ya singa saray arum ya nasyon ya walay toon ari da. Lapud satan ya kerew da, singa da impulisay si Jehova bilang ari ra. (1Sa 8:4-8) Tua ya duga labat ya ilaloan na totoo so sakey a panarian ya iletneg na Dios ta insipan to itan ed si Abraham tan Jacob, a singa abitla la. Wala ni arum ya basiyan da ed satan ya ilalo a singa samay impropesiya nen Jacob nen ompapatey la nipaakar ed si Juda (Ge 49:8-10), samay imbaga nen Jehova ed Israel kapaway da ed Ehipto (Ex 19:3-6), saramay kondisyon ed Ganggan a sipanan (De 17:14, 15), tan anggan diad kabiangan na samay mensahe ya impaibaga na Dios panamegley nen Balaam (Nu 24:2-7, 17). Binitla met nen Hana, say matoor ya ina nen Samuel, itan ya ilalo diad pikasaki to. (1Sa 2:7-10) Anggaman ontan, agni kompletton impaamta nen Jehova so “sagrado sekreto” to nipaakar ed Panarian tan agto ni imbaga no kapigan so panaon na pangiletneg to ed satan, pati no anto ray magmaliw ya uksoyan tan kabiangan na satan ya gobierno—no kasin diad dalin odino diad tawen itan. Kanian sirin, nagmaliw ya mapalakbat iray totoo ed inkerew da na toon ari.

w11 1/1 27 ¶1

Nanmatoor Anggano Kinmakkapuy so Liknan To

Antoy imbaga nen Jehova sanen impikasi nen Samuel iyan bengatla? “Unor mon amin so ibagay totoo ed sika. Aliwan sikay impulisay da; siak so impulisay da ya ari ra.” Nayarin aleewan so liknaan nen Samuel ed sayan imbaga nen Jehova. Balet ta agaylan impanginsulto na totoo ed Makapanyarin-amin a Dios! Inggangan nen Jehova si Samuel a pasakbayan iray Israelita ed no antoray nasagmak da sano wala lay ari ra. Anggano pinasakbayan la ra nen Samuel et siansian impasoot da: “Andi! Labay mi nawalaan na ari.” Lapud maunor si Samuel ed Dios, linma tan nilanaan to so pinilin ari nen Jehova.—1 Samuel 8:7-19, MB.

w10 1/15 30 ¶9

Say Pananguley nen Jehova—Apaneknekan a Sankaabigan!

⁹ Apaneknekan ed saray agawa a tua so impasakbay nen Jehova. Say uley na sakey a toon ari et nanresulta ed seryoso iran problema ed Israel, lalo la no aliwan matoor itan ya ari. No nonoten tayo iyan agawa, agtayo la pankelawan no akin a nensaman ni, say gobiernon uuleyan na totoon agmikabat ed si Jehova et agmakanpangiiter na maabig tan permanente iran resulta. Tua a wala ray politikon onkekerew na panamendisyon na Dios diad pansasagpot dan mamawalay kareenan tan seguridad, balet panon iran bendisyonian na Dios anta ag-ira manpasakop ed pananguley to?—Sal. 2:10-12.

Saray Espiritual a Kayamanan

w02 4/1 12 ¶13

Akin a Manpabautismo?

¹³ Say pampataoli so nepeg a nagawa sakbay a manpabautismo tayo bilang Tastasi nen Jehova. Say pampataoli et sakey a boluntaryon kiwas a mabulos a ginawa na sakey ya interon-puson nandesisyon a manumbok ed si Kristo Jesus. Ipulisay na saratan ya indibidual so datin mauges a kurang da tan determinado ira a manggaway maptek ed imaton na Dios. Diad Kasulatan, saray Hebreo tan Griegon verb a manutukoy ed pampataoli so walaan na kabaliksan a mangibeneg. Sayan kiwas so mankabaliksan na idago ed Dios diad pangibeneg ed sakey a mauges a kurang. (1 Arari 8:33, 34) Say pampataoli so mankaukolan na ‘pangawa na saray manepeg ed panbabawi.’ (Gawa 26:20) Kakaukolan na satan so pangitalirak ed palson panagdayew, onkiwas a mitunosan ed saray ganggan na Dios, tan pangisaklang na nikabkabiig a debosyon ed si Jehova. (Deuteronomio 30:2, 8-10; 1 Samuel 7:3) Say pampataoli so manresulta ed pananguman ed panag-isip,

gagala, tan personalidad tayo. (Ezequiel 18:31) “Manpataoli” itayo legan met a nasasalatan na balon personalidad iray agmardios a walna. —Gawa 3:19; Efeso 4:20-24; Colosas 3:5-14.

PEBRERO 28-MARSO 6

KAYAMANAN ED SALITA NA DIOS | 1 SAMUEL 9-11

“Diad Gapo et Mapaabeeba si Saul”

w20.08 10 ¶11

Mapaabeeba ya Manakar a Kaibay Dios

¹¹ Say unonan pantongtongan tayo et si **Arin Saul**. Nen kabataan ni et mapaabeeba. Aliwan atagtagey so paknengneng to ed sarili to tan ngalngali agto ni ingen awaten so responsabilidad ya iiter nen Jehova. (1 Sam. 9:21; 10: 20-22) Diad inlabas balet na panaon, nagma-liw ya mapaatagey si Saul tan wala ray ginawa ton agto kanepegan ya gawaen. Pinmaway itan ya aliwliwan ugali to nen nagma-liw lan ari. Aminsan, agto la naalagar si propetaan Samuel. Kalian imbes ya mapaabeban manmatalek ed si Jehova, sikato la so nambagat anggano agto itan kanepegan ya gawaen. Lapud satan, aderal so relasyon nen Saul ed si Jehova tan nakal bilang ari. (1 Sam. 13:8-14) Komon ta makaarial tayo ed agawad si Saul. Agtayo gagawaen iray bengatlan agtayo kanepegan ya gawaen.

w14 3/15 9 ¶8

No Panon ya Mansiansian Masakripisyo

⁸ Nanengneng tayod agawad Arin Saul no panon ya pakapuyen na makasarilin ugali so inkamasakripisyo tayo. Nen kagapogapo to ni labat ya ari, sikatoy mapaabeeba. (1 Sam. 9:21) Agto dinusa iramay Israelitan binalaw day inkaari to, anggano walay kanepegan to ta say Dios so anurod sikato. (1 Sam. 10:27) Inunor toy panangigiya na espiritu na Dios kalian atalo na saray Israelita iray Ammonita. Kayari to, mapa-

abeba ton binidbir ya analo ira lapud tulong nen Jehova.—1 Sam. 11:6, 11-13.

w95 12/15 10 ¶1

Saray Ammonita—Totoo ya Angibales na Busol ed Kaabigan

Angibales la lamet na busol iray Ammonita ed kaabigan nen Jehova. Agbinaliwala nen Jehova iyan inaayep a panamagyaw. “Say espiritu na Dios so kinmiwas ed si Saul sanen nadngel to irayan salita [nen Nahas], tan say sanok to so pinmetang.” Diad silong na panangiwanwan na espiritu na Dios, tinipon nen Saul so sakey a puersa a tuyopen na 330,000 a mibabakal a lalaki a sigpot ya inkaykayat da iray Ammonita ya “anggapoy duaran sanulop ya atilak ed sikara.”—1 Samuel 11:6-11.

Saray Espiritual a Kayamanan

w05 3/15 22 ¶8

Saray Pabitar ed Libro na Unionan Samuel

9:9—Anto so kabaliksan na balikas a “say tatawagen natan a propeta sikato nen inmuna a panaon so tinawag a managnengneng”? Nayarin ipapabitar na sarayan salita a legan a lalon magmamaliw a prominente iray propeta diad panaon nen Samuel tan legan na uley na arari ed Israel, say salitan “managnengneng” so asalatan na terminon “propeta.” Si Samuel so ipapasen a sinkaunaan ed saray nanggegenda-nan a propeta.—Gawa 3:24.

Magmaliw ya Epektibo ed Ministryo

w15 4/15 6-7 ¶16-20

Sikayo ran Elder, Panon Yon Momoriaen so Pangipasal ed Arum?

16 Mabulos ya manbangat, agnapipilitan. Nen naamtaan nen Samuel ya labay na saray Israelita so nawalaay ari, ag-aliketan tan pakalikna to et impulisay da. (1 Sam. 8:4-8) Diad tua, agto labay ya gawaen so kerew da kalian amit-

lo nin binagaan nen Jehova ya dengelen to ra. (1 Sam. 8:7, 9, 22) Anggano ontan so alikna nen Samuel, ag-nanimon odino nanem-em na sakit na linawa ed pinili nen Jehova ya onsalat ed sikato bilang lider. Nen ingganggan nen Jehova ya lanaan toy Saul, mabulos ya inmunor, aliwan lapud obligasyon to itan ya gawaen, noagta lapud inaro toy Jehova.

¹⁷ Singa si Samuel, maar-aro met iray eksperiensiadon elder natan ed saray ipapasal da. (1 Ped. 5:2) Mabulos iran mangibabangat tan ag-ira natatakot ya onla lad ipapasal da so arum ya pribilehyo da. Agda ipapasen iray ipapasal da ya kakompetensia, noagta bilang pinablin “kakimeyan” ya ontulong ed sikaran mangasikaso ed pankaukolan na kongregasyon. (2 Cor. 1:24; Heb. 13:16) Agaylay liket na sarayan mabulos ya elder sano nanenengneng dan uusaren la na saray ipapasal da so abilidad da parad pankaabigan na kongregasyon! —Gawa 20:35.

¹⁸ **Magmaliw ya kaaro, aliwa labat ya mangbangat.** Diad samay agew ya akabat nen Samuel si Saul, sarag to la komoy mangalay larak tan tampol to lan iyibung ed ulo nen Saul, insan to la ibaki—alanaan ya tua balet ag-aka-paraan. Aliwan ontan so ginawa nen Samuel. Sikatoy angigana na panaon pian kalkalnan ni-paraan so puso nen Saul. Antis ton nilanaay Saul, saniba ran angan, intagar ton nanakar, abayag iran nantongtong, tan nampainawa ni raringen. On, inalagar nen Samuel so dugan panaon pian lanaan so balon ari.

¹⁹ Ontan met natan. Antis ya ipasal na elder so sakey a brother, nepeg ya mangigana ni panaon pian nakaaro to tan magmaliw iran komportable ed sakey tan sakey. Nayarin nandurumay paraan pian nagawaan itan na saray elder, depende ed situasyon tan kultura ed lugar da. Balet angan iner so lugar ya panaayaman yo, no ma-

ngigana kayoy panaon pian nakaibay ipapasal yo anggano busy kayo, singa yo ibabagad sikan-ton, “Importante kad siak.” (**Basaen so Roma 12:10.**) Seguradon naapresya na ipapasal yo so maaron atension ya iiter yod sikato.

²⁰ Sikayo ran elder, tandaan yo: Say maong ya managbangat et aglabat mabulos ya mangipasal na arum, noagta nepeg ya inar-aro to met so ipapasal to. (Ikompara so Juan 5:20.) Akin et importante itan? No nalikna na ipapasal yo ya inar-aro yo, mas mabulos ya manpabangat. Kalian sikayo ran pinabbabli min elder, legan kayon mangipapasal, komon ta aliwa ki’ labat ya managbangat—noagta maong kayo met ya karo.—Uli. 17:17; Juan 15:15.